



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 252, Datë 03.09.2026

MBI

**NJOHJEN DHE LEJIMIN E OPERIMIT TË IMPIANTIT TË DEPOZITIMIT TË
ENERGJISË ELEKTRIKE TË SHOQËRISË “GERTI” SH.P.K.**

Në mbështetje të neneve 16, 51 dhe 136, pika 2 të ligjit nr. 59/2026 “Për sektorin e energjisë elektrike”; nenit 11, pika 3 e ligjit nr. 24/2023 “Për nxitjen e përdorimit të energjisë nga burimet e rinovueshme”; neneve 13, 14, pika 9 dhe 15 të Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike, të miratuar me vendimin e bordit të Entit Rregullator të Energjisë (ERE) nr. 109, datë 29.06.2016, e ndryshuar; Rregullave për njoftimin dhe regjistrimin pranë ERE-s të impianteve të depozitimit të energjisë elektrike gjatë regjimit kalimtar, miratuar me vendimin e bordit të ERE-s nr. 230, datë 18.08.2026, si dhe nenit 15 të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; Bordi i ERE-s, në mbledhjen e tij të datës 03.09.2026, mbasi shqyrtoi relacionin me nr. 2015/22 prot., datë 02.09.2026, të përgatitur nga Drejtoria e Licencimit, Autorizimeve dhe Garancisë së Origjinës “Mbi njohjen dhe lejimin e operimit të sistemeve të energjisë elektrike të shoqërisë “GERTI” sh.p.k.”,

Konstatohet se:

1. Të dhëna për shoqërinë

- Shoqëria “GERTI” sh.p.k., me shkresën e protokolluar në ERE me nr. 2015 prot., datë 02.07.2026, ka paraqitur kërkesën për licencim në veprimtarinë e prodhimit të energjisë elektrike nga impianti fotovoltaiik, me kapacitet të instaluar 10 MW, me vendndodhje në Vlashaj, Njësia Administrative Shupenzë, Bashkia Bulqizë, Qarku Dibër, duke përfshirë dhe veprat ndihmëse/njësité e depozitimit të energjisë elektrike, si vepra ndihmëse, pa ndryshuar kapacitetin total të centralit.
- Në vijim të këtij aplikimi, bordi i ERE-s me vendimin nr. 193, datë 13.07.2026, vendosi të fillojë procedurën për licencimin e shoqërisë në këtë veprimtari, ku me shkresën nr. 2015/6 prot., datë 17.07.2026, ERE ka njoftuar Agjencinë Kombëtare të Mjedisit (AKM) dhe Operatorin e Sistemit të Shpërndarjes (OSSH) sh.a. për fillimin e kësaj procedure. Nga ana e tyre nuk ka rezultuar të jetë depozituar ndonjë përgjigje.
- ERE po ashtu ka njoftuar Ministrinë e Infrastrukturës dhe Energjisë (MIE) për fillimin e kësaj procedure, nëpërmjet shkresës nr. 2015/7 prot., datë 17.07.2026, ku ndër të tjera është referuar dhe kërkesa e shoqërisë për përfshirjen e veprave ndihmëse/njësive të depozitimit të energjisë elektrike dhe se ERE i ka kërkuar shoqërisë që të depozitojë qëndrimin përkatës të MIE-s për sa kërkuar nga shoqëria në lidhje me këto njësi depozitimi.
- Për këtë kërkesë të shoqërisë dhe për trajtimin e rasteve të ngjashme, MIE është njoftuar dhe me shkresën e ERE-s nr. 2234 prot., datë 27.07.2026, ku është kërkuar një qëndrim institucional, duke qenë se trajtimi i veprave të depozitimit të energjisë elektrike kërkon një

- vlerësim të harmonizuar ndërmjet dispozitave të ligjit nr. 59/2026, kushteve kontraktuale dhe akteve administrative që kanë mundësuar zhvillimin e projektit.
- Rezultoni se aktualisht shoqëria është pajisur me licencën përkatëse për prodhimin e energjisë elektrike, nëpërmjet vendimit të bordit nr. 223, datë 10.08.2026, ku në konstatimet e këtij vendimi është vlerësuar se kërkesa e shoqërisë për përfshirjen në licencë të impianteve të depozitimit të energjisë elektrike do të bëhet në vijim, në përputhje me kuadrin ligjor dhe rregullator në fuqi, si dhe me procedurën përkatëse të përcaktuar nga ERE.
 - Në vijim, në ERE është depozituar shkresa e Ministrisë së Infrastrukturës dhe Energjisë nr. 6448/1 prot., datë 27.08.2026, protokolluar në ERE me nr. 2234/1 prot., datë 28.08.2026, ku ka sqaruar, ndër të tjera se, në zbatim të nenit 51, pikat 3, 4 dhe 5, të ligjit nr. 59/2026, *“Për sektorin e energjisë elektrike”*, impiantet në zhvillim ose operim në hyrjen në fuqi të ligjit, pa licencën përkatëse, njihen dhe lejohen të operojnë sipas licencës ekzistuese, në kushtet dhe afatet e përcaktuara nga ky nen. *Në këtë kuadër, MIE vlerëson se shoqëria “GERTI” sh.p.k. mund të vijojë operimin sipas licencës ekzistuese gjatë periudhës tranzitore të parashikuar nga ligji, në përputhje me kushtet dhe afatet e përcaktuara në ligj.*
 - Në kushtet kur sistemet e depozitimit të energjisë elektrike janë deklaruar nga shoqëria në kuadër të procedurës së licencimit në veprimtarinë e prodhimit të energjisë elektrike, si pjesë e projektit të centralit fotovoltaiik dhe pa rritur kapacitetin e instaluar të tij, duke mbajtur në konsideratë regjimin kalimtar të parashikuar në nenin 51 të ligjit nr. 59/2026 *“Për sektorin e energjisë elektrike”*, si dhe qëndrimin e MIE-s të përcjellë me shkresën nr. 6448/1 prot., datë 27.08.2026, vlerësohet se këto sisteme do të trajtohen në përputhje me këtë regjim.
 - Për rrjedhojë, vlerësohet se ekzistojnë kushtet për përfundimin e trajtimit të kërkesës së shoqërisë, nëpërmjet njohjes së sistemeve të depozitimit të energjisë elektrike të shoqërisë *“GERTI” sh.p.k.*, të përbëra nga 2 (dy) njësi me kapacitet energjitik 5 MWh secila, me kapacitet total energjitik 10 MWh, dhe lejimit të vijimit të operimit të tyre gjatë regjimit kalimtar të parashikuar nga neni 51 i ligjit nr. 59/2026. Ky trajtim nuk përbën dhënie të një licence të re për veprimtarinë e depozitimit dhe as modifikim të licencës së prodhimit të energjisë elektrike apo ndryshim të kapacitetit të instaluar të centralit fotovoltaiik prej 10 MW. Shoqëria ka detyrimin që gjatë të gjithë kohës së operimit të impiantit të depozitimit të energjisë, injektimi i energjisë elektrike në rrjet të mos tejkalojë kapacitetin e instaluar të centralit fotovoltaiik prej 10 MW.
 - Në zbatim të regjimit kalimtar të parashikuar në nenin 51 të ligjit nr. 59/2026, shoqërisë i njihet e drejta e vijimit të operimit të sistemeve të depozitimit të deklaruara pranë ERE-s, deri në përfundimin e periudhës 12-mujore të përcaktuar në pikën 5 të këtij neni, brenda së cilës shoqëria ka detyrimin të aplikojë për licencimin e veprimtarisë së operimit të impiantit të depozitimit, sipas legjislacionit në fuqi.
 - Duke qenë se me vendimin nr. 230, datë 18.08.2026, ERE ka miratuar *Rregullat për njoftimin dhe regjistrimin pranë ERE-s të impianteve të depozitimit të energjisë elektrike gjatë regjimit kalimtar*, vlerësohet se informacioni dhe dokumentacioni i administruar në këtë procedurë mund të përdoret edhe për qëllimet e njoftimit dhe regjistrimit, duke u plotësuar, kur është e nevojshme, me dokumentacionin shtesë të kërkuar. Përmbushja e këtyre kërkesave do të trajtohet në kuadër të procesit të njoftimit dhe regjistrimit.

Për gjithë sa më sipër, bordi i ERE-s,

Vendosi:

1. Të njohë operimin e sistemit të depozitimit energjisë elektrike të deklaruar nga shoqëria “GERTI” sh.p.k., të përbërë nga 2 (dy) njësi me kapacitet energjitik 5 MWh secila, me kapacitet total energjitik 10 MWh, dhe të lejojë vijimin e operimit të tij në kuadër të licencës për veprimtarinë e prodhimit të energjisë elektrike, të miratuar me Vendimin e Bordit të ERE-s nr. 223, datë 10.08.2026.
2. Shoqëria “GERTI” sh.p.k. ka detyrimin të sigurojë që gjatë të gjithë kohës së operimit të impiantit të depozitimit të energjisë fuqia totale e injektuar në pikën e lidhjes në rrjet të mos tejkalojë në asnjë moment 10 MW, përkatësisht kapacitetin e instaluar të centralit fotovoltaiik të licencuar, si dhe të respektojë kushtet dhe kufizimet teknike të përcaktuara nga operatori i rrjetit.
3. E drejta për vijimin e operimit të impiantit të depozitimit të energjisë elektrike sipas pikës 1 të këtij vendimi i njihet shoqërisë vetëm për periudhën kalimtare të parashikuar në nenin 51 të ligjit nr. 59/2026 “Për sektorin e energjisë elektrike”. Shoqëria ka detyrimin që, brenda afatit 12-mujor të përcaktuar në pikën 5 të nenit 51 të këtij ligji, të paraqesë pranë ERE-s aplikimin për licencimin e veprimtarisë së operimit të impiantit të depozitimit të energjisë elektrike, në përputhje me legjislacionin dhe aktet rregullatore në fuqi për ushtrimin e këtij aktiviteti 4. Njohja dhe lejimi i operimit sipas këtij vendimi nuk përbën dhënie apo modifikim të licencës për veprimtarinë e prodhimit të energjisë elektrike dhe nuk ndryshon kapacitetin e instaluar prej 10 MW, të përcaktuar në licencën e shoqërisë “GERTI” sh.p.k”.
4. Përfundimi i periudhës kalimtare të përcaktuar në pikën 3 të këtij vendimi nuk krijon të drejtë për vijimin e operimit të sistemeve të depozitimit të energjisë elektrike në kuadër të licencës së prodhimit, përtej rasteve dhe kushteve të parashikuara nga legjislacioni në fuqi.
5. Ky vendim është objekt rishikimi në rast se rezulton se të dhënat, dokumentacioni ose rrethanat mbi të cilat është bazuar vendimmarrja e bordit të ERE-s kanë ndryshuar ose nuk përputhen me gjendjen faktike dhe juridike të impianteve të depozitimit të energjisë elektrike.
6. Drejtoria e Licencimit, Autorizimeve dhe Garancisë së Origjinës, të njoftojë shoqërinë “GERTI” sh.p.k., Ministrinë e Infrastrukturës dhe Energjisë (MIE), Agjencinë Kombëtare të Mjedisit (AKM) dhe shoqërinë “Operatori i Sistemit të Shpërndarjes” (OSSH) sh.a., për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni të vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare. Paraqitja e ankimit nuk pezullon vlefshmërinë e vendimit, përveçse kur gjykata vendos ndryshe në përputhje me legjislacionin në fuqi.

Ky vendim botohet në Fletoren Zyrtare.

KRYETARI
Petrit AHMETI